

Pemandu terselamat, kereta jatuh gaung

SEREMBAN 12 Mac - Berpantang maut sebelum ajal. Peribahasa ini sesuai bagi menggambarkan nasib seorang lelaki yang terselamat daripada maut walaupun kenderaannya terbabas dan berpusing beberapa kali sebelum jatuh ke dalam gaung sedalam 50 meter.

Kemalangan yang hampir meragut nyawa lelaki itu berlaku pukul 10 malam tadi di Kilometer 11.2, Jalan Seremban-Mantin di sini dan ia dikatakan berpunca daripada tindakan pemuda tersebut, R. Ganeskumar, 24, cuba mengelak daripada melanggar seekor anjing yang melintas jalan.

Ganeskumar hanya cedera ringan dan terpaksa mendaki gaung itu selama setengah jam sebelum menghubungi rakannya untuk meminta bantuan.

Ketika kejadian, dia dalam perjalanan dari rumahnya di Lukut menghala ke Kolej Legenda Mantin sebelum kereta Toyota Corolla yang dipandunya gagal dikawal lalu berpusing beberapa kali sebelum terbabas ke dalam gaung kerana mengelak seekor anjing melintas jalan.

Ganeskumar yang masih terkejut dengan kejadian itu memberitahu, dia ternampak seekor anjing tiba-tiba melintas jalan di kawasan selekoh laluan itu.

"Ketika itu, keadaan jalan agak licin selepas hujan. Sebaik sahaja anjing itu melintas, saya cuba mengelak namun kenderaan saya hilang kawalan biarpun saya menekan brek.

"Saya hanya mampu memegang stereng sekuat hati dan berdoa supaya terselamat," katanya ketika di-

temui di tempat kejadian hari ini.

Ganeskumar memberitahu, kereta yang dipandunya berpusing beberapa kali sebelum terjatuh gaung sedalam 50 meter.

Menurutnya, selepas itu, dia keluar dari kenderaan menerusi pintu penumpang dan mendaki gaung kira-kira setengah jam sebelum tiba di jalan raya.

Dia segera menghubungi rakan-rakannya di kolej untuk meminta bantuan dan dibawa ke hospital oleh rakan-rakannya yang tiba tidak lama kemudian.

"Kalau melihat keadaan gaung itu, sudah pasti ramai yang anggap mereka yang terlibat dalam nahas seperti ini akan maut.

"Saya bersyukur kerana terselamat dalam nahas ini dan hanya mengalami cedera ringan," katanya.